

中國邊疆史志集成

東北史志

第二部

16

全國圖書館文獻縮微複製中心

中國邊疆史志集成

東北史志

第二部
16

全國圖書館文獻
縮微復制中心

載不過一百八九十石而所用舵水等役十二三人計每運之費反浮於淮船之值則安得有餘銀扣還府庫耶今日擊冬深停運各役坐食厚餉殊為糜費合無於中酌處或令各役於停運之日減支月糧照看糧夫例止給一半候運日全給或照雇船事例停運之日止留舵工看守餘人盡皆散回任其生理不給月糧直至發運每石亦給一錢七分而即於中扣出官船造費若干以還府庫此船若賃與各役駕駛者然如此庶有扣價還帑之日耳合行酌議為此牌仰本府官吏照牌事理即將各役拘集到官從長計議務要妥確具由報道以憑詳奪施行毋得遲延須至牌者

一牌行登州府

萬曆四十七年十一月初一日

三十九

欽差整飭登州海防總理海運兼管登萊兵巡屯田
道山東等處提刑按察司副使陶 為赴邊甚急望
闕漸遙再瀝愚忱仰祈

聖鑒事照得海運之興專為公私匱乏陸運費奢海
省十倍且多兵需糧水路迅捷旦夕可濟耳頃據濟
南府呈請查議過該府所屬近海州縣海運詳由到
道閱得詳文意匪急公詞多悠謬隨該本道詳批海
運之設原因遠餉繁多陸運費侈故冒不測之險與
海若爭須臾之命乃為民窮財盡思為地方節一分

之耗蠹并為

國家省一分之加派耳山東海運而取之近海州縣豈非以舟楫代車輓耶乃濱州等處舍海而陸棄舟而車則海運之謂何且未至交船費已至每石一兩以外再加舟費人工又當半倍則當時

廟堂之議奚不令山海關陸運而必遠煩於山左山左之議何不令長山鄒平等處之近登者為車運而又令沿海一帶之遠登者車運也可謂弗思之甚矣據該州縣之議不過謂

餉臺原文有運赴登州一語耳殊不思運赴登州以登為餉道咽喉本道兼轄濟青故欲令赴登地查核而行亦欲其由海而運赴登州未嘗令由陸而運赴

登州也又不過謂各屬所有船隻俱為登州雇用海口無船耳殊不思登州向亦無船惟其實心海運故不憚遠覓之四方遂雇及於濟屬諸船也濟屬見係有船者果實欲海運何不具文請還原船或做登州設法雇募海船乎況濱蒲利豐等處船戶原自不乏近日如趙明性李雙興諸人共八十餘家俱赴本道告領船費造船八十餘隻前來供運該州縣而調度有方招徠得法彼當告造於本地又何患乎無船也總之人無實心遂至事無實際果如其所議而行之未有不可駭可笑者也該府想亦見執迷不通不得已而為之轉詳然令本道又將此詳轉之何處而曰此法可行耶查軍興之法阻撓逗遛俱有明罰各屬

泄泄說夢如此似屬難寬姑以虜警稍緩尚堪改圖
該府速行該州縣洗心滌慮另議詳奪至於馬政廳
之專管既稱得人押運員役之未備尚屬疎漏該府
更當倣登萊例行之毋得苦累收頭柄用衙役也轉
盼春和開洋在邇竅詞畫餅萬勿再隄遠左倘至呼
庚根究違誤本道不能為各屬諱耳限十日內報繳
等因批發濟南府去後為照青郡一體海運已經行
文數月各屬寂不一應誠恐臨期無措又以遁詞支
吾合預行申飭為此牌仰本府官吏照牌事理文到
即便馳行該府所屬近海運糧州縣掌印趙運等官
急將海運濟遼事務著實舉行毋效濟屬虛應玩愒
本道定摘實揭報

部院分別論劾劣轉決不寬假各具遵行緣由馳報
本道查考須至牌者

一牌行青州府

萬曆四十七年十一月初二日

四十

閱視邊務吏科右給事中姚 一本為遵

旨出關謹據真確見聞再陳末議以祈

聖裁事該職行至永平府接兵部移會手本內稱據
覆職同官張登揭帖奉

聖旨是姚宗文著作速出關與經撫諸臣相機行事
北關既陷其酋長子侄部落何在著于西虜處查訪
明確以憑優恤處置欽此職于本月二十一日抵山

海關即當馳驅東去緣薊鎮真保等處閱視文移難
于關外轉發應在關料理而差往西虜通官夷丁員
役或宜此中調取及隨行材官家丁人等而以出關
之議未定行李不備今以關外苦寒應為體恤辦給
不能數日就緒于次月初一日方能出關職驛壯在
途見

畿輔騷動所在驛遞紛紛告勞懷詩人載薪之慮至
關後與永平道袁應泰自關門至一片石匹馬周視
厯覽形勢見城垣單薄兵衛更少又懷綢繆徹土之
思謹以切要事宜列款上請幸

皇上留神軍

國省覽施行

計開

一議防守看得山海關為鎖鑰重地況今東方告急烽火時聞防盜者防之門戶間則易為力由山而永平薊州以此通灣此門戶之漸入漸深也戰見山海關住城已多圯壞邊牆未為高墉總加修築正此其時而往在

都中時臺臣王象恒見語深懷未圖惟以錢糧不易湊手為慮今據道臣袁應泰詳議先修傾圯關城先築缺口先增敵臺先接羅城約費八萬三千八百三十七兩昨見撫臣劉曰梧疏捐節省銀七千餘兩為修築之費此外尚七萬餘兩在該部宜立時

題覆以權為目前補葺之計至于總行修理費更十萬雖曰措處頗難然今為何時此為何地今日費十萬金而不為他日即欲以百萬金錢圖保障之功而不可得也并宜多方設處以圖全效職在

都中時止知山海關為東要路耳比來此中親至一片石地方見其外當東西夷虜之衝內通石門建昌諸路止城牆一帶亦多圯壞思之大可寒心合于舊城之外山阜相連之處增置敵臺三座其城牆圯壞不堪者亟令該道估計工程並修築宿重兵為衛庶幾緩急有賴伏乞

聖裁

一議添兵夫雖有天險非兵不守陰平劍閣不能止鄧艾之入前事可鑒也職前疏

請自山海至通州得勝兵三萬足屏翰

神京通州之兵在土著者可查可招可練職前疏已詳言之聽兵部講究

題覆外其薊鎮東協等處原議招兵五千永平道臣袁應泰標下新兵三千悉心訓練已漸整肅可觀山海關內外止一千名其二千名分派黃土嶺大毛山義院口等十一處兵散而力薄萬一有警勢不能支欲調彼以援此恐鞭長之不及腹也合再添兵五六千以二千增之關內以千餘增之一片石其餘視各路之緩急為添兵之

多寡問之該道云招兵止議糧餉而無安家之費亦易辦也今義院界嶺日報夷情稍集熊羆之師可無犬羊之慮伏乞

聖裁

一議海運夫從陸運糧率二鍾而致一石其艱難萬狀昨者登萊海運事半功倍遠左幸無脫巾之呼第瀚海風濤隨時順逆放洋揚帆而撐駕占候者非海上長年誠難必布帆之無恙也自天津達山海路循海岸似差易為力臺臣王象恒董元儒言其便督餉侍郎李 昨致書商畧意亦相符臣自望海樓直睇芝蔴灣一衣帶耳去關門不過二千里如運船抵山海起陸出關

至灣復舟至旅順風力之便不過一晝夜不敢
徑以運船越關出海者一則以傍岸有石開洋
便險一則以船通海上關禁難譏起陸止二十
里車馬人力轉運亦易聞督餉侍郎日且至關
料理如造船合式更取江南熟水知風候者令
其撐駕此近濟登萊運事之窮至於登萊道臣
陶朗先鴻猷良畫力肩重任宜加級陞俸以待
異日另議優轉伏乞

聖裁

一請優恤

畿輔臣奔走在途蒿目還顧見兵馬之絡繹運解之
續紛異常擾動民不堪命矣前通州衛官幾欲

盡逃以密雲道臣喻安性委曲安全甫能終事其餘郡邑驛遞皆蹙額相告上人之多方幹濟能稍救目前之困而東事一日未寧則求一日之息肩未有期也職謂既用其力不得不念其生如加派等項在

畿輔三協一帶斷宜寬免昨見程登指放地以重征誣鄉紳以霸佔不顧

國家利害不念小民休戚尚欲朘斃獨之髓以供其漁獵之術也方今四海困窮征求不應止緣此輩言利召殃以生釁孽宜即置之斧鑕其驛遞中多應付不給似宜斟酌量加以地方協濟如再加之本地方以甦驛遞之苦是剗肉補瘡之

說也伏乞

聖裁

一請亟議糧餉職任山海閱數日見各援兵至關者有河南之毛兵有山東之募兵其尚留關外有湖廣之土兵雖僅四千人而日糜糧餉已嗷嗷矣況在遼左者已十餘萬而後此相繼出關者尚未有定額也不預為之計此輩能枵腹荷戈否耶職累疏言借處糧餉而計部未聞定畫司官避怨所呈堂上

請者猶然考成舊套耳嗟乎具疏伏

闕不能望

九閭之開而顧後瞻前不能望一身之慮慮誠周矣

如燃眉無救而轉瞬召亡誰無誤

國之咎乎職虛心再訪爭云稅契一節所得不貲計部前已議及然章程慢而莫應也宜行各省直撫按計其遠近定以限期督令征解其事例一項前見工部主事華顏有封典一款此以

聖明

錫類之仁開天下以榮親之念自文職貲郎以至武階盡人子也木本水源爭思自盡願者必多此皆積重細以成鉅分之無幾合之有濟如奉旨後各省撫按宜嚴督藩司留心經理以紓

國用至於樂輸慕義豈曰無人勸興未彰後人卻步如南京太僕寺少卿吳炯捐貲鉅萬不為薄矣